



CONVENIO DE COLABORACIÓN ENTRE A CONSELLERÍA DE EDUCACIÓN, UNIVERSIDADE E FORMACIÓN PROFESIONAL, A CONFEDERACIÓN DE EMPRESARIOS DE LUGO (CEL) E A FUNDACIÓN CEL INICIATIVAS POR LUGO PARA O ESTABLECEMENTO DUN MARCO DE ACTUACIÓN CONXUNTA EN FAVOR DO DESENVOLVEMENTO DO ESPÍRITO EMPREENDEDOR NO MARCO DE EDUEMPRENDE

Lugo, 19 de xullo de 2019

REUNIDOS

Dunha parte, dona....., conselleira de Educación, Universidade e Formación Profesional da Xunta de Galicia, en representación desta e de conformidade coas atribucións conferidas no artigo 34.1 da Lei 1/1983, do 22 de febreiro, reguladora da Xunta e da súa Presidencia e no Decreto 96/2018, de 26 de setembro, do seu nomeamento.

Doutra don....., secretario xeral da Confederación de Empresarios de Lugo (CEL), en nome e representación da devandita organización, elixido coma tal na Xunta de Goberno, celebrada o 15 de xullo de 2003, e que continúa a ocupar este cargo, segundo marcan os estatutos.

E don....., presidente executivo da Fundación CEL Iniciativas por Lugo, en nome e representación da devandita organización, elixido como tal polo Presidente da Confederación de Empresarios de Lugo en data 28 de febreiro de 2008, ratificado no seu cargo o 23 de maio de 2016 polo Consello de Administración de propia Confederación, e continúa a ocupar este cargo, segundo marcan os estatutos.

Interveñen en función dos seus respectivos cargos e en exercicio das facultades que para convir, en nome das entidades que representan, teñen conferidas.



EXPOÑEN

1. Que a Consellería de Educación, Universidade e Formación Profesional é o órgano da Administración da Comunidade Autónoma de Galicia ao que lle corresponden, entre outras, as competencias e funcións en materia de planificación, regulación e administración do ensino regrado en toda a súa extensión, niveis e graos, modalidades e especialidades.
2. Que a Confederación de Empresarios de Lugo, creada en 1977 e a Fundación CEL Iniciativas por Lugo, creada en 1997, teñen entre os seus fins ten entre os seus fins programar, desenvolver e executar accións formativas.
3. Ante o déficit emprendedor en Galicia é necesario crear as condicións para que poidan prosperar as iniciativas e as actividades emprendedoras. Neste senso o Plan de emprendemento no sistema educativo de Galicia Eduemprende aprobado no 2010 ten como obxectivo estratéxico a implantación na comunidade educativa desta cultura emprendedora necesaria para mellorar a competitividade das nosas empresas e a empregabilidade do alumnado galego.
4. Que no Consello Europeo de Lisboa de marzo de 2000, que deu lugar ao programa “Educación e Formación 2010”, se recoñeceu a necesidade do fomento das iniciativas emprendedoras desde o ámbito educativo, así como a necesidade de crear políticas de educación e de formación que fomenten a cultura emprendedora e innovadora como motor da innovación, da competitividade, da creación de emprego e do crecemento económico, no que o fomento do espírito emprendedor se recoñece como unha competencia clave para enfrontar os cambios sociais e económicos que se derivan da sociedade do coñecemento.

En virtude do exposto e no exercicio das competencias que teñen atribuídas, as partes intervinientes formalizan o presente convenio con base nas seguintes



CLÁUSULAS

Primeira. Obxecto do convenio.

O obxecto deste convenio de colaboración é a colaboración das entidades asinantes para promover e fomentar actividades e iniciativas emprendedoras dentro do marco de Eduemprende, Plan de emprendemento no sistema educativo de Galicia.

Segunda. O programa está composto por:

- Xornadas de fomento do emprendemento

Está dirixido ao alumnado de 5º e 6º de Educación Primaria e de 1º e 2º de Educación Secundaria Obrigatoria. Consisten na realización de visitas a Confederación de Empresarios de Lugo e á Fundación CEL Iniciativas por Lugo, reunión cun emprendedor ou unha emprendedora, visita a empresas da zona industrial e/ou encontros nos colexios con emprendedores, empresarios e persoal da confederación.

- Concurso “Atrévete a ter unha idea”

Dirixido ao alumnado participante nas xornadas. Consiste en buscar unha boa idea de negocio, redactada como máximo en dous folios. Os traballos serán individuais e premiarase as dúas mellores ideas de 5º e 6º de Educación Primaria e de 1º e 2º de Educación Secundaria Obrigatoria.

En xuño levarase a cabo a clausura do programa nun acto público ao que estarán invitados representantes do mundo da empresa e da Administración educativa.

Terceira. Actuacións

As actuacións a desenvolver xirarán en torno a:

- A) Os eixes do Plan de emprendemento no sistema educativo de Galicia [Eduemprende](#).

Estes eixes son:

- E1.Sensibilización e motivación. Medidas que cómpre desenvolver para que a comunidade educativa perciba a importancia de construír e fomentar a cultura



empresadora, para recoñecer na súa contorna actitudes e valores emprendedores, favorecendo a súa integración nos centros educativos e creando unha conciencia emprendedora.

- E2.Capacitación emprendedora. Iniciativas que se destinen a mellorar as capacidades en competencias emprendedoras do alumnado e a súa autonomía, a través da información, a orientación e unha formación axeitada para cada nivel educativo. Incídese, así mesmo, na dotación de recursos ao profesorado e na súa capacitación, na procura dunha repercusión final no alumnado.
- E3.Fomento e apoio da empresarialidade. Actuacións que se refiren ao apoio ao alumnado con habilidades emprendedoras, para a posta en marcha de proxectos empresariais viables e para a posta en práctica de ideas innovadoras de negocio.
- E4.Coordinación e aproveitamento de iniciativas. Comunicación, investigación, coordinación e posta en valor das actividades que en materia de emprendemento sexan de utilidade para o sistema educativo de Galicia e que teñan un efecto de transversalidade sobre o conxunto de medidas do programa Eduemprende .

B) Calquera outra colaboración que incida favorablemente na empregabilidade do alumnado do sistema educativo de Galicia.

Cuarta. Medidas.

Para tal efecto a Consellería de Educación, Universidade e Formación Profesional, a través da Dirección Xeral de Educación, Formación Profesional e Innovación Educativa, a Confederación de Empresarios de Lugo e a Fundación CEL Iniciativas por Lugo articularán as medidas que sexan precisas, co fin de favorecer a participación dos centros educativos nas actividades a desenvolver e na utilización de materiais e ferramentas que se elaboren, para conseguir a implantación da cultura emprendedora entre o alumnado e a mellora da empregabilidade.



Quinta. Compromiso das partes.

A Consellería de Educación, Universidade e Formación Profesional se compromete a seleccionar os centros educativos participantes no programa, a coordinar as actuacións entre a Confederación de Empresarios de Lugo e a Fundación CEL Iniciativas por Lugo e os centros educativos, a difundir o programa Eduemprende- Atrévete Lugo entre o profesorado e o alumnado dos centros así como, a realizar o seguimento do mesmo.

A Confederación de Empresarios de Lugo e a Fundación CEL Iniciativas por Lugo se comprometen a pór as súas instalacións, o persoal técnico e responsables das empresas que se atopan no mesmo á disposición do desenvolvemento do programa.

- Nas xornadas de fomento do emprendemento participará o persoal técnico e os empresarios que desenvolvan as súas actividades na Confederación de Empresarios de Lugo e na Fundación CEL Iniciativas por Lugo. Acompañarán ao profesorado e o alumnado durante estas xornadas.

- A colaborar coa Dirección Xeral de Educación, Formación Profesional e Innovación Educativa na recollida dos datos das actividades desenvolvidas para a súa difusión.

Sexta. Gasto.

O presente convenio non supón compromiso de gasto para as partes.

Sétima. Comisión de seguimento e control.

Establecerase unha comisión de seguimento, control e supervisión que terá como funcións a programación, o seguimento e a avaliación das actuacións derivadas do presente convenio, así como a súa interpretación; en concreto, prestará unha especial atención ao adecuado desenvolvemento das accións que se poñan en marcha como resultado dos acordos alcanzados no seu seo.

Esta comisión estará constituída por:

- Dous/dúas representantes da Consellería de Educación, Universidade e Formación Profesional.
- Dous/dúas representantes da Confederación de Empresarios de Lugo.
- Dous/dúas representantes da Fundación CEL Iniciativas por Lugo.



- Un/unha funcionario/a da Consellería de Educación, Universidade e Formación Profesional, que actuará como secretario/a.

Esta comisión celebrará as reunións que considere oportunas para promover a realización das actuacións que poidan derivarse do presente convenio e resolver as cuestións que xurdan da súa aplicación.

Oitava. Recollida de datos.

Sempre dentro do marco establecido Lei orgánica 3/2018, do 5 de decembro, de protección de datos de carácter persoal, a Confederación de Empresarios de Lugo e a Fundación CEL Iniciativas por Lugo, poderán recoller datos dos asistentes ás actividades incluídas neste convenio, coa finalidade de xestionar eficazmente o seu desenvolvemento, reportar axeitadamente aos organismos que aportan os fondos do seu financiamento, e informar aos asistentes de novas actuacións do seu interese no futuro. Estes datos tamén poderán ser cedidos á Consellería de Educación, Universidade e Formación Profesional, para o axeitado seguimento, control e supervisión das accións incluídas neste convenio.

Novena. Protección de datos.

De conformidade co disposto na Lei orgánica 3/2018, do 5 de decembro, de protección de datos persoais e garantía dos dereitos dixitais, e co Real decreto 1720/2007, do 21 de decembro, o alumnado, o profesorado e a fundación que por razón das actividades formativas teñan acceso a datos de carácter persoal, non disporán dos mesmos con finalidade distinta á esixida polas accións formativas.

Neste sentido, haberá que atender ao contemplado no Regulamento (UE) 2016/679 do Parlamento Europeo e do Consello de 27 de abril de 2016 relativo á protección das persoas físicas no que respecta ao tratamento de datos persoais e á libre circulación de estes datos e polo que se derroga a Directiva 95/46 CE (Regulamento xeral de protección de datos).

Décima. Publicidade do convenio, transparencia e bo goberno.



A sinatura deste convenio suporá o consentimento expreso do interesado á administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 9/2013, do 9 de decembro, (BOE 10-12-2013) de transparencia, acceso á información pública e bo goberno e co Decreto 126/2006, do 20 de xullo, polo que se regula o Rexistro de Convenios.

Undécima. Vixencia do convenio.

O convenio, **que deixa sen efecto ao anterior**, entrará en vigor na data da súa sinatura e terá vixencia ata o 30 xuño de 2020, podendo prorrogarse por acordo das partes mediante a addenda correspondente, conforme ao artigo 49 da Lei 40/2015. Non obstante, o convenio poderá denunciarse por calquera das partes. A denuncia deberá realizarse por escrito e con dous meses de antelación á finalización do convenio.

Duodécima. Natureza xurídica, lei aplicable e solución de controversias.

De conformidade cos artigos 4 e 6 da Lei 9/2017, do 8 de novembro, de contratos do sector público pola que se traspoñen a ordenamento xurídico español as Directivas do Parlamento Europeo e do Consello 2014/23/UE e 2014/24/UE do 26 de febreiro de 2014, este convenio e as colaboracións específicas que deriven do mesmo quedan excluídos do ámbito da referida lei, rexéndose en consecuencia polas súas propias cláusulas e polas normas especiais que correspondan, aplicándose os principio de dita lei 9/2017 para resolver as dúbidas e lagoas que puideran presentarse.

Dada a natureza administrativa deste instrumento xurídico, as controversias ou cuestións litixiosas que puideran xurdir na súa aplicación e non puidesen ser solucionadas no seo da comisión de seguimento, serán resoltas pola xurisdición contencioso-administrativa.



Lido o presente convenio, atópano conforme e asínano na data e lugar indicados
ao comezo.

A conselleira de Educación, Universidade e Formación Profesional

.....

O secretario xeral da Confederación
de Empresarios de Lugo

O presidente executivo da Fundación
CEL Iniciativas por Lugo

.....

.....